

# INUIT ATAQATIGIIT

## INATSISARTUNI



Nuuk, 24. maj 2013

Inatsisartut Suleriaasianni § 37 naapertorlugu Naalakkersuisunut imaattunik apeqquteqar-punga.

(Inatsisartuni ilaasortaq Naaja Nathanielsen, Inuit Ataqatigiit)

### Apeqqutit:

1)

**Naalakkersuisut uuliamik ujarlernissamut akuersissutit maanna amerlassusaat attatiinnarniarpaat, taamaalillutillu taamaallaat nutaanik akuersisarumallutik ingerlatseqatigiiffiit maanna ingerlasut akuersissutiminnik utertitsissapata? Naalakkersuisut qinnuigineqarput ullumikkut akuersissutiniit amerlanerusunik tunniussisarnissamut tunuarsimaarnermut tamatumunnga pissutaasoq itisileq-qullugu.**

2)

**Naalakkersuisut akuersissuteqarfissat ullumikkut "ammasutut" taaneqartartut, uuliasioqatigiiffiillu ukioq kaajallallugu qinnuteqaateqarfigisinnaasaat peernaler-saarpaat?**

3)

**Naalakkersuisut uppernarsarsinnaavaat uuliasiornermut tunngasutigut ukiaru inatsisit allannguutissaannik saqqummiisoqarani, malittarisassat maanna atuuttut attatiinnarneqassasut?**

### Tunngavilersuut:

Apeqqutit saqqummiunneqarput Aatsitassaqaarnermut Inussutissarsiornermullu Naalakker-suisup 21. maj tusagassiortunik katersuutsitsinermini paasissutissiinerinut qisuariaatit.

Tusagassiortunik katersuutsitsinermini Aatsitassaqaarnermut Inussutissarsiornermullu Naa-lakkersuisup erseqqissarpaa, Naalakkersuisut uuliamik ujarlernerup unitsinnissaanik piler-saaruteqanngisaannarnikut. Kisaatigineqartoq tassaavoq "akuersissutininik nutaanik tunnius-sinissamut tunuarsimaarnissaq". Kisianni "tunuarsimaarnissaq" pineqartup nassuiaataa ersernerluppoq. Avatangiisit isumannaalisaanerullu ernumaginerat pissutaanngilaq, tassami Jens Erik Kirkegaard oqarpoq Nunatta pineqartunut tunngatillugu malittarisassai nunar-suarmi tamarmi sukannerneerpaanut ilaasut.

Akuersissutininik nutaanik tunniussisarnermik unitsitsigallarnissaq illersorluarsinnaavara, inat-sisit sukanganerusariaqarnerannik erseqqissartariaqarnerannilluunniit pisariaqartitsineq tun-ngavilersorluagaappat. Kisianni taamaappasinngilaq. Jens Erik Kirkegaard oqarpoq, tekno-logii nutaaq pitsaanagerusorlu inerisarneqartuortoq, taakkulu inatsisinut ilanngunneqassasut. Kisiannili inatsisinut ilaareerpoq, teknologii pissarsiarineqarsinnaasoq pitsaanerpaaq ator-ne-qassasoq.

Paasinikuugarpara immap naqqanik uttortaanerit uuliamillu ujarlernerneerit paasissutissat saqqummersut uagutsinnut annertuumik iluaqutaasut. Taakku tassaapput ilisimasat pingaarutillit akeqanngitsumik pissarsiarisavut. Kisianni ilisimasanik taakkunanga pissar-sinissarput maanna killilerniarneqarpoq.

Ullumikkut sumiiffiit ilaat "ammasunik" taaneqartarput. Taakku tassaapput uuliasioqatigiiffiit qaqugukkulluunniit uuliamik ujarlerfigiumallugit qinnuteqarfigisinnaasaat. Uuliasioqatigiiffiit sumiiffiit taakku ujarlerfissatut neqeroorutigineqarnissaat utaqqisariaqanngilaat. Uuliasioqatigiiffik pineqartuni "ammasuni" ujarlerumalluni aqagu qinnuteqassappat, Naalakkersuisut qinnuteqaatip pimoorullugu suliarinissaa pisussaaffigaat, nunalu ataatsimut isigalugu akuersissutit killeqartuinnaat tunniuneqartarnissaannik kissaateqarnertik patsisiliullugu itingartitsisinnaanatik. Taamaammat soqutiginarpoq tusassallugu Naalakkersuisut sumiiffiit "ammasut" atorunnaarsinniarneraat imaluunniit inatsisit allanngortinniarneqarnersut akuersissutit killeqartut kisiisa tunniunneqartalernissaat anguniarlugu.

Uuliamik ujarlernissamut akuersissutit "amerlanerpaaffilernerat" isumaga malillugu aqukku-minaattussaavoq. Tusarnikuuarput ingerlatseqatigiiffiit ilaasa akuersissutitik ukiuni aggersuni utertilersaaraat. Tamannali qularnaarsinnaanngilarput, naluarpullu qassit utertinneqarumaarnersut, taamaalillunilu aamma ingerlatseqatigiiffinnut soqutiginnittunut nalunaarsinnaanngilagut, akuersissutinik atorneqanngitsunik ukiuni aggersuni peqalerumaarnerluta. Naalakkersuisut taama aalajangiineratigut imartatsinni ujarlernikkut ineriartorneq tamaat unittoortissinnaavarput. Ilutigisaanilli Naalakkersuisut suliffissaaleqisut aatsitassarsiornerup iluani ilinniartinnissaat aatsitassarsiornermillu isertitassat eqqartortuarlugit.

Siumoortumik kissaatigissavara apeqqutit tamarmik ullut suliffiit qulit qaangiutsinnagit akineqareernissaat.